

CYFARFOD ARBENNIG O GYNGOR SIR YNYS MÔN

Cofnodion y cyfarfod a gynhaliwyd ar 29 Gorffennaf 2014

- YN BRESENNOL:** Cynghorydd Vaughan Hughes (Cadeirydd)
Cynghorydd Jim Evans (Is-Gadeirydd)
- Y Cynghorwyr Raymond Jones, Lewis Davies, R Dew, Ann Griffith, John Griffith, D R Hughes, K P Hughes, W T Hughes, Llinos Medi Huws, A M Jones, G O Jones, R LI Jones, Cynghorydd R.Meirion Jones, Richard Owain Jones, Jeffrey M.Evans, Alun W Mummery, Dylan Rees, J A Roberts, Nicola Roberts, P S Rogers, Alwyn Rowlands ac Ieuan Williams
- WRTH LAW:** Prif Weithredwr,
Cyfarwyddwr Corfforaethol (Datblygu Cynaliadwy),
Prif Swyddog Cynllunio (EGJ),
Prif Swyddog Datblygu (Strategaeth) (CB),
Pennaeth Dros Dro y Gwasanaethau Democrataidd,
Rheolwr Gwasanaethau Cyfreithiol,
Swyddog Pwyllgor (MEH).
- HEFYD YN BRESENNOL:** Mr. Gareth Hall (Ynys Ynni),
Mr. Alex Melling (AMEC Environment & Infrastructure).
- YMDDIHEURIADAU:** Y Cynghorwyr T LI Hughes, Victor Hughes, Carwyn Jones, H E Jones, R G Parry OBE ac Dafydd Rhys Thomas

1. DATGANIAD O DDIDDORDEB

Ni chafwyd yr un datganiad.

2. DERBYN UNRHYW GYHOEDDIADAU GAN Y CADEIRYDD, ARWEINYDD Y CYNGOR NEU'R PRIF WEITHREDWR

Mynegodd Cadeirydd y Cyngor ei longyfarchiadau a'i ddymuniadau gorau i Dîm Cymru yng Ngemau'r Gymanwlad yn Glasgow. Mynegodd hefyd ei ddymuniadau gorau i bawb fydd yn cystadlu yn yr Eisteddfod Genedlaethol yn Llanelli ac yn Sioe Sir Ynys Môn ym mis Awst. Estynnwyd llongyfarchiadau i bawb a fu'n llwyddiannus yn y Sioe Frenhinol Gymreig yr wythnos ddiwethaf.

Mynegodd y Cadeirydd ei longyfarchiadau hefyd i staff y Cyngor Sir a fu'n llwyddiannus yn eu harholiadau proffesiynol.

Ar nodyn tristach, cyfeiriodd y Cadeirydd at ddau unigolyn o'r Ynys oedd wedi marw'n ddiweddar. Yn gyntaf Mr. Derek Williams o Lanuwchllyn, un o'r tri a sefydlodd Gwmni Theatr Maldwyn ac a oedd yn gyfrifol am nifer o sioeau cerdd. Roedd Mr. Williams yn hanu yn wreiddiol o Amlwch. Lai nag wythnos yn ôl yn dilyn

salwch hir, bu farw Mr. Robin Evans, Hanesydd Arforol o Foelfre. Roedd yn fab i longwr a pharhaodd yn nhraddodiad Mr. Aled Eames gan ddogfennu hanes morwrol Moelfre a thu hwnt mewn nifer o lyfrau a chyhoeddiadau yn cynnwys 'Moelfre a'r Môr', 'Ynys Môn a'r Môr' a Chymru a'r Môr'.

Estynnodd y Cadeirydd ei gydymdeimlad hefyd ag unrhyw Aelod neu Swyddog oedd wedi cael profedigaeth ers cyfarfod diwethaf y Cyngor hwn. Safodd yr Aelodau a'r Swyddogion mewn teyrnged ddistaw fel arwydd o'u parch.

3. CYFARWYDDYD CYNLLUNIO ATODOL ADEILAD NIWCILIAR NEWYDD YN WYLFA

Cyflwynwyd - adroddiad gan y Cyfarwyddwr Corfforaethol (Datblygu Cynaliadwy) ac Uwch Swyddogion eraill mewn perthynas â'r uchod.

Cyflwynodd y Cyfarwyddwr Corfforaethol (Datblygu Cynaliadwy) Mr. Christian Branch, Mr. Gareth Hall (Ynys Ynni) and Mr. Alex Melling (AMEC Environment & Infrastructure) i'r cyfarfod.

Dywedodd y Cyfarwyddwr Corfforaethol - o ystyried maint, cymhlethdod ag amserlenni'r Adeilad Niwclear Newydd arfaethedig, roedd paratoi a mabwysiadu'r CCA yn weithgaredd yr oedd angen i'r Cyngor Sir roi blaenoriaeth iddo. Bydd y CCA yn cyfrannu tuag at sicrhau bod yr effeithiau tebygol sy'n wybyddus yng nghyswllt yr Adeilad Niwclear Newydd a'i ddatblygiadau cysylltiedig yn cael eu nodi, eu hosgoi, eu lliniaru ac y ceir iawndal lle bo hynny'n bosibl; a bod y manteision cymdeithasol-economiadd sy'n gysylltiedig â'r gwaith adeiladu a gweithredu'r orsaf bŵer yn cael eu gwireddu'n llawn.

Roedd y gwaith o baratoi'r CCA wedi ei gydlynu gan y Gwasanaeth Adfywio Economaidd a Chymunedol dan gyfarwyddyd nifer o Uwch Swyddogion y Cyngor Sir. Bu AMEC Environment and Infrastructure (y rhai sy'n darparu cefnogaeth ac arbenigedd amlddisgyblaethol i'r Cyngor Sir) yn gyfrifol am ddrafftio'r ddogfen. Roedd adnoddau i gyllido'r gwaith o baratoi'r CCA wedi eu sicrhau drwy'r Cytundeb Perfformiad Cynllunio gyda Pŵer Niwclear Horizon.

Rhoddodd y Prif Swyddog Datblygu Strategaeth gyflwyniad sleidiau i'r Cyngor Sir. Cyfeiriodd at yr egwyddorion oedd yn cyfarwyddo'r holl brosiect ac a oedd wedi eu cynnwys yn yr adroddiad a hefyd y 7 Parth a nodwyd sy'n ceisio cyfarwyddo'r datblygiadau eraill sy'n gysylltiedig â'r Adeilad Niwclear Newydd i bentrefi mwyaf Ynys Môn ac ar hyd coridorau cludiant allweddol. Nododd Mr. Alex Melling bod y gwaith ymgynghori ffurfiol ar y CCA eisoes wedi dechrau ym mis Chwefror 2014 ac y derbyniwyd cyfanswm o 52 o ymatebion unigol. Roedd natur y sylwadau wedi'u cynnwys yn yr adroddiad.

Soniodd Cadeirydd y Pwyllgor Sgriwtini Partneriaeth ac Adfywio wrth y cyfarfod am y prif faterion a godwyd yn y Pwyllgor Sgriwtini.

Rhai materion a leisiwyd gan yr Aelodau ynghylch y canlynol:-

- Yr effaith ar yr iaith Gymraeg ac ar dreftadaeth yr Ynys. Dywedodd y Swyddogion bod y Cyngor Sir (drwy'r Rhaglen Ynys Ynni) a Pŵer Niwclear Horizon wedi cytuno mewn egwyddor i gyd-ariannu person ar secondiad o Uned Iaith Gymraeg Llywodraeth Cymru i ddatblygu proses integreiddio briodol a mesurau lliniaru yng nghyswllt yr iaith Gymraeg.
- Yr effaith ar fusnesau bychan a lleol yr Ynys yn ystod y gwaith o adeiladu'r safle niwclear newydd. Dywedodd y Swyddogion y bydd Coleg Menai a Phrifysgol Bangor yn arwain ar y rhaglen ddatblygu sgiliau er mwyn galluogi cwmnïau lleol i fedru cystadlu am waith yn ystod adeiladu safle Wylfa.
- Yr effaith ar dai h.y. tai rhent a thai cymdeithasol. Nodwyd bod y Cyngor wedi gwneud llawer o waith yng nghyswllt y galw am lety gweithwyr adeiladu a'r effaith y gall ei gael ar dwristiaeth, y farchnad dai a llety rhent.
- Pryderon ynglŷn â storio gwastraff niwclear. Dywedodd y Swyddog bod yr egwyddorion oedd ynglŷn â datblygiadau niwclear newydd, yn cynnwys storio gwastraff niwclear y tu allan i sgôp y CCA Adeilad Niwclear Newydd..
- Gofynnwyd cwestiynau ynghylch a oedd gweithdrefnau diogelwch/ymadael digonol yn eu lle ar gyfer preswylwyr yr Ynys pe bai digwyddiad mawr yn digwydd yn Wylfa. Dywedodd y Swyddogion y bydd yn rhaid gwerthuso'r isadeiledd priffyrdd yng nghyswllt y mater hwn.

PENDERFYNWYD bod y Cyngor Sir:-

- **Yn nodi pwrpas, sgôp ac egwyddorion y Cyfarwyddyd Cynllunio Atodol Adeilad Niwclear Newydd yn Wylfa;**
- **Yn cydnabod rôl y Cyngor Sir yn y broses ganiatáu statudol ar gyfer yr Adeilad Niwclear Newydd arfaethedig;**
- **Yn cefnogi ac yn mabwysiadu yn ffurfiol y Cyfarwyddyd Cynllunio Atodol Adeilad Niwclear Newydd yn Wylfa.**

Ataliodd 4 eu pleidlais.

Daeth y cyfarfod i ben am 3.30 o'r gloch

**Y CYNGHORYDD VAUGHAN HUGHES
CADEIRYDD**